



Suliassap nassuiarneqarnera – Kalaallit meerartaasa 22-usut 1951-imi Danmarkiliartinneqarnerat pillugu oqaluttuarisaanermut tunngasumik qulaajaasoqarnissaanut suliassap nassuiarneqarnera

Aallarniut

Børne- og socialministeri aamma Peqqissutsimut, Isumaginninnermut Inatsisinillu atuutsitsinermut Naalakkersuisoq kalaallit meerartaasa 22-usut 1951-imi Danmarkiliartinneqarnerat kingusinnerusukkullu meeqqat pineqartut amerlanersaasa Nuummi børnehjemmimut inissinneqarsimanerat pillugit oqaluttuarisaanermut tunngasumik nassuiaasiornermik aallartitsissasut Ministeriunerup aamma Naalakkersuisut Siulittaasuata ulloq 27. februar 2019 isumaqatigiissutigaa.

Børne- og socialministerip Peqqissutsimut, Isumaginninnermut Inatsisinillu atuutsitsinermut Naalakkersuisoq suleqatigalugu suliassap nassuiarneqarnera manna sularisimavaat, taannalu oqaluttuarisaanermut tunngasumik nassuiaasiornermut sinaakkusiissaaq.

Oqaluttuarisaanermut tunngasumik nassuiaasiornermut imai

Suliniutip pissutsinik piviusunik kiisalu inuttut misigisanik kingunerinillu erseqqissaanissaq nassuiaasiornermi siunertarineqarpoq.

Oqaluttuarisaanermut tunngasumik nassuiaasiornermi tulliuuttut qulaajarniarneqassapput:

- Suliniutip oqaluttuarisaanermut atassuteqarnerata oqaluttuassartaa.
- Oqartussat, suliffeqarfiit suliniaqatigiiffiillu pisumut peqataasimasut eqqarsaasersuutigisimasaat, aalajangiiffigisimasaat iliuuserisimasaallu makkununga tunngassuteqartut:
 - aalajangiiniarnermi iliuuserisimasat suliniummik aallartitsinermik kinguneqartut
 - meeqqanik aallartinneqartussanik toqqaaniarnermi, matumani meeqqat qanigisaannik oqaloqateqartarsimanerit ilanngullugit
 - meeqqat pineqartut 1951-52-imi Danmarkimiinneranni
 - meeqqat pineqartut kingusinnerusukkut inersimasunngornissartik tikillugu Nuummi børnehjemmimut inissinneqarsimanerit pingaaruteqartut
 - meeqqanut pineqartunut meeravissiannngortinneqarsimasunut
 - suliniutip naammassineqarneranut atatillugu iliuuserineqarsimasut, matumani iliuuserineqarsimasup sooq nangeqqinneqarsimannginnera ilanngullugu.
- Meeqqat Danmarkimiinnerannik kingusinnerusukkullu Kalaallit Nunaanniinnerannik qulaajaaneq, matunnga ilanngullugit:
 - Danmarkimi inuunermi atukkat
 - Nuummi børnehjemmimi pilersinneqaaqqammersumi inuunermi atukkat
 - Qallunaat kalaallillu inuiaqatigiit meeqqanut pineqartunut isiginneriaasiat.
- Meeqqat pineqartut misigisimasaat kinguneqartitsinerallu, matumani pineqartut suli inuusut apersorneqarsimanerat ilanngullugu.



Sulap ingerlanneqarnerani takkussuuttut aamma ilisimatusartunit ilanngukkusunneqartut sammisamut tunngassuteqarsinnaasut allat Børne- og Socialministeeriaqarfik aamma Isumaginninnermut Inatsisinillu Atuutsitsinnermut Naalakkersuisoqarfik peqatigalugit erseqqissaaffigineqassapput.

Oqaluttuarisaanermut tunngasumik nassuiaasiornerup aaqqissuunneqarnera

Nassuiaasiorneq inunnit 2 – 3-nit suliamut tunngatillugu ilisimasalinnit ingerlanneqassaaq. Suliamut tunngatillugu ilisimasallit oqaluttuarisaanermik tunngaveqarlutik ilisimatusarsimanertik tunngavigalugu saqqummiussisimassasut kiisalu suliamut tunngatillugu ilisimasalinnit minnerpaamik ataatsip Kalaallit Nunaata immaqalu naalagaaffeqatigiinnerup oqaluttuarisaanerat ilisimasaqarfigissagai pingaartinneqarpoq.

Inuit suliamut tunngatillugu ilisimasallit nalinginnaasumik ilisimasaat, oqaluttuarisaanermi najoqqutat naleqquttut kiisalu inuit kalaallit meerartaasa Danmarkimut nuutsinneqarneranni peqataasimasut imaluunniit pisumit eqqugaasimasut apersorneqarsimanerat oqaluttuarisaanermut tunngasumik nassuiaasiornermi tunngavigineqassapput.

Suliamut tunngatillugu ilisimasallit oqaluttuarisaanermut tunngasumik nassuiaasiornerminnut atatillugu suliffeqarfinnik, suliniaqatigiiffinnik il.il. isumasiuinissamut kiffaanngissuseqartinneqassapput.

Oqaluttuarisaanermut tunngasumik nassuiaasiornermik aallartitsineq

Børne- og Socialministeeriaqarfiup Isumaginninnermut Inatsisinillu Atuutsitsinnermut Naalakkersuisoqarfik suleqatigalugu kikkut nassuiaasiornermik toqqassavai pineqartullu isumaqatigiissuteqarfigalugit.

Tamanut saqqummiunneqarnissaa siunertaralugu oqaluttuarisaanermut tunngasumik nassuiaat kingusinnerpaamik ulloq 1. juni 2020 danskit naalakkersuisuinut Naalakkersuisunullu tunniunneqassasoq anguniarneqarpoq.

Martha Abelsen
Naalakkersuisoq for Sundhed,
Sociale Anliggender og Justitsområdet

Mai Mercado
Børne- og Socialminister